



Editorial

‘Lalpa lopina chu suk lat in hung um ngei in a’

Bible sim ding Matthai 8:23 – 27

Tulai ka lungthim ngai tua na lua len pen khat chu, Khristian / Gingu te hinkhua ah thil tung zing sek, kipak na lam thil leh dana lam thil te'n ei lam tua zing lai ahin. Bang ti'n lunggel len a pha di aw ti'n ngai tua na ei piat. Chanchinpha Matthai zik bung 8: 23-27 na chun, Jesu Khrista tawh a nungzui te kuang ah achuan u, Dil ah thiltung apat,thu tawm cha vak gen ka nuam a..

Tichun ginchak gual lo tak mai in thigawpi nasa tak in a hung han leh tui kinawk leh tuifawn ten kuang chu ahun chup/khu vang vang ta zia phat a chun, a masang ua chu thina lo ngal, bang ma dang in a lungthim uh lua din ka gincha puai. Lungkham tawp khawk a zia din mun ah aum lai ua khan, a Hotupau chu kuang sung a ipmu in aum a, zia hun lai tak a chun mihiam lunggel na mei in “I Hotupa chu nawp tak chan in aki ipmut ah, I lungkham beidawng lai un le, ei hepha puai ti ut na lungthim nei ding un ging chak aum hi”.

A hin la zia lungkham na leh lau

na guam ah aum lai u chun Jesu Khrista thil hithei na leh a lopi na amu khaw law tau ahi. Zia hun a chun, thigawpi le tuifawn te chung in thu a pia ti chun ahung thip veng veng mai tau hi. Zia thigawpi leh tuifawn te ziak a khan Jesu Khrista thil hi thei na lopi tak in aki hiat be a, zia lo a chun thil hing zosia chung bâk ah, a hing lo leh a hah thei lo (inanimate object) te chung ah le thu a nei dan aki hiat khaw law thei hi. Gintu hinkhua hile zia gual tho chu ahi. Lei leh van a Lalpen nungzui te ihi nau ahin, haksat na te i chung un a tung thei zing a achang leh pumpelh thei lo di khawp hial in aki lang sek hi. Ahinla zia te haw ziak tak a chun, Lalpa lopi na I chung un ahung lang zaw sek ahi. Ziazia a chun, Lalpa a ding a bang gual haksatna, lungkhamna te leh thina ten ei tuam zing ma leh a tawp a chun Lalpa thil hi thei na leh a lopi na hung ki lang ding in beiseina nei chiat ding in iki til thak thak u ahi.

Khuga Sadar Presbytery ah thagau gam ka khualzinna

(My Spiritual Journey in the life of Khuga Sadar Presbytery (KSP)).

**By: - Rev. S.T.Kaia Vaiphei,
Executive Secretary, KSP**

Thumapui:

Pathian mapuina jal leh KSP nu leh pate dawisakna zal in tu ka dinmun hi tung thei ka hi. Ka phulo malzawlina ka dawng a, mawl tak leh ginum tak ah a na ka sepnate Lalpa'n ei hiat piak a, a nasepna ziak ah genthei ka thawknate, ho siat mu da ka channate Lalpa'n ei hiatpi in tuni hin ka phulo PCI Administrative Secretary tiang ei langkai ta, ka tit ziak ahi pua, mihing leh Pathian dawisakna ka chan ahiziak in lopina Lalpa chang ta hen. Zia ka thuzik hi mi tamtak keima mimal chanchin leh kigenphatna ngai pawl I um mai thei ui. Himaleh ka tup pipen chu ka tanglak lai leh khanglai lai ah Pathian thu ah ka la kimatchak dan leh Khuga Sadar Presbytery sung ah pan ka la laknate chu simtu khenkhat a ding ah kitilkhona ahi khak leh ti ahi zawi. Tuhin Sadar District sung ziang in le Pastor leh Bible zillai le tamtak a hung um ta, ziate hi ka nung hun zui a hung um ta, ziate hi "ka gasua" ka ti nuam ahi. Zia thuzik (article) a hin ka neu lai chanchin hung genpan ing ka tin, zaw tak leh ka tanglak lai a pat Pathian thu ah Sadar District sung ah ka hung kimatchak dan leh Theology ka hung zil ah Pastor ka hung hi nung ah KSP ah ka nasepnate in zo ding ka hi. Ziate chu taksa leh thagau gam ka khualzinna chu ahi.

Neulai Chanchin:

Leilon ponveng khua'n 5th March 1967 in ka piang a, khaw ka hiat thei tak tak masang in Harauthial (L.Tangnuam) Khawlui lam in ka kipem ua, ka

nu'n ka kichawn ua chun, "Harauthial chu la tung zo nai puai" ei ti. Himaleh khaw ka he thei ta, kum 3/4 vel mi hi ding ka hi. Leilon Ponveng ah ka in uh chu ka he thei a, ka sang pian le ka he,

chun ka in sak lam deu ua chun U Khupneilal (Lalpu) te a cheng ua, kei hi U Lalpu pu minsak ka hia, Khotinsoi – Soitinkai ka hi. Ka pu thini ka he, zia ni chun ka pi'n ei pai a, zu ei dawn sak hi. Nu leh pate mawl lai ahi ziak in ka pian kum hi a la he puau a, piankum he lo in sawt tak ka um hi. Ka pu Upa Kaizang in kochuam census bu in mi tamtak pian kum kitup tak in a la kawi a, ka va ki-et leh ka u te zosia pian kum a um a, kei uh a neulamte ka pang puau a, a ziak chu nu leh pa nungzui ah Khristian ka hinai lo ziak uh hi pen ding hi. Pastor ka hi nung in Leilon Pastor Quarters in 1999 in ka um a, zia chun Pa Zanglun (Thiamneihoi pa) in ka pian kum Record bu in kitup tak in a la kawi a, ka nu leh pa min a zik pua, Leilon ah ka zawlpa, ka tupa pa (Seitinkai) ahi diam ka ti leh a U Nekkhomang pian kum le a la kawi a, ama tawh kum kibang ah piang ka hi phat un kei ka hi ti a kichian ta, ka kipak ma ma a, pa Zanglun chu ken le puanak Jacket khat ka chawk piak hi. Zia a record dungzui ah chun 5th March 1967 ah piang ka la hi. Tichun Harauthial ah ka chen suk uh hi kum 1970 vel hi ding dan

ahi. Zia chun le Khristian ka hi nai diak pua, Pathian ni tak leh law-ite biakin kikhawm ah chia chu ka eng sek a, Pathian ni tak leh mi biakin kikhawm ah chia sek, ei kigawppi ding la um ngai ta lo, Pathian nikhat chu kei le ka nu leh pa hiat lo in biakin kikhawp-na chun ka chia a, kochuam upa chu U Tongneilun (Lamkholian pa) ahin, min a hung lam phat in kei le zakcha sa san ka dingdawk a, “Kei le Khristian ka hi nuam tai, ka min ei khum tau in,” ka ti phat in ka min chu a khum ta, Khristian ka hung hi ta, ka kipak ma ma hi.

Ka tanglak lai:

Kum 1978 kum in Harauthial a pat chun L. Phaijang in ka hung cheng kit ua, zia chun le ka ute a lian lam sia chu RCG kochuam ah chun min a kikhum pai ua, kei uh nu leh pa thunuai ah um nalai, a neulam sia chu mumal lo ah chawmkhat ka um nung un Leilon P.C. a pat Upa Ngampau, Upa Kaijang, Pu Seikhai, U Pachung leh Upa Tualpau lawi malatnan Pu Hemkhai pansan in L. Phaijang ah Pathian awi nai-lo teksia lam kawp li lam ziate chu: Pu Ngamkohen te nupan, Pu Hemliante nupan, Pu Lutzakaite nupan, Pu Seikholamte nupan chu

Pathian awi sak in Presbyterian kochuam in a hung kiphudawk tau hi. Khristian ahi ding kuan un, Khristian ka hi ding uh ahi tan, ti in Cheiraoba ni hin uicha a kitha khawm ua, zu phatak in a dawn ua, zia zaw chun Pathian a awi tau. Ka neulai in ka nu leh pa'n zu a dawn sek ua, a kham tak ua leh a kina, a kinial sek ua, ka khawp sek ma mai. Himaleh, ka nu leh pa ka pachakna chu Pathian a hung awi ua pat khatvei le zu a dawn kha ta puau.

Ka U Luntinlal a pat a nuai lam mi pathum chu ka nu leh pa'n ei thunun ua, "Khristian ka hi ding uh ahi tan, ka nung lei hun zui ding uh ahi. Kei uh lak ah la hung pan ua ahileh Christmas tak leh tawka chual ka chawk piak ding ahi" ti ka nu'n ei gen ka he zing a, ei chawk piak him ah tawka chual ka chen masak penna ahia, ka kipak ma ma hi. Tichun kum 1979 kum in ka nu leh pa tawh Rev. K. Lala khut in Baptisma ka chang khawm ui. Zia pat chun ka thagau lam khualz-inna chu a hung kipan ta ahi.

School leh zilna lam:

Ka school kaina hi a la mumal pua, thingtang ah um a kihiziak leh School kai phakna

ding gamlat ziak in School ka la kai hak a, ka let nung kum 7/8 vel ah school kai pan dan ka hi. Ka School kaina masapen chu Leilon UJB School ahin, 1974 vel hi ding ahi. Zia zaw ah chun Suangtun ah ka U Jangchuante in ah um in Teacher Miss. Khaineihoi nuai in Mission school in ka la kai kit a, zia chun Primary ka sim lai ahi. Chun Pastornu Mrs. Liannem in Leilon ah amau In ah zingkal tha school a bawl in le ka la kai kha, Zia zaw a chun Teacher Tualkap school Suangtun in le ka la kai kha ahi. L. Phaijang kochuam chu KSP in Mission School a hung pia, zia chun teacher masapen chu Miss. Khaineihoi (Rev. Liankhopau chanu) ahi. Ama zaw in Teacher Dawnglal a hung um kit a, ama kiang ah chun class-ii tiang ka sim tai. L. Phaijang Mission School chu lakdaw ahi phat in Private school bawl/hawn ahia, teacher Baburam Nepali pa nuai in class -iii ka sim, a kum kit in Harauthial ah Private school in Teacher K. Kama in a bawl a chun class- iv ka sim hi. Kum 1982 vel a pat in (L) Lamtinlal Memorial School ah L. Phaijang leh Harauthial ah Class - v leh Class- vi, ka sim zaw in 1983 in Pengjang ah ka um a,

Living Water School, Matijang in class – vii ka sim a, ka tupa Lamkholian tawh ka kaikhawm ui. A kum kit 1984 in Standard School, Checkon, Imphal in ka kaikhawm kit ua, class – viii, ka sim hi. Tichun 1995 a pat Pengjang tung kit in Kangvai High School in Class –ix leh x ka sim a, 1997 in Matric ka zo hi.

Pathian Kona:

L.Phaijang ah Presbyterian kochuam ah nu leh pate tawh ka hung um ua chun tanglak ka hung hi ta, Pathian thu leh la in ka lunglut ma ma a, lekha sim lam leh umchan khanchan in mi genphat ka hung hi to ahi. Ka hinkhua ah thilmak leh Pathian lemguat chu KSP mission school ah hung kaito in, matric ka passed masang in KSP mission school teacher ka hung hi. Zia hi Pathian in a nasem ding ah ei kona pakhat ahi. Kum 1987 in Matric ka exam ding kuancha hin KSP Teacher ding a hung kihawl a, ka va pan leh post khat awng a chun mi -12 ka va interview ua, zia chun kei a naupang pen chu ei hun la tau a, Tuilileibul ah chia ngal ding in KSP hotuten ei tiu a, maleh Matric ka exam ding thu leh Matric ka exam zaw tak leh ka chia thei

ding thu ka gen a, tichun exam ka zaw in ei hung thak tau ahi. Matric result a hung suak phat in ka hung passed kit ta, kei la college kai ka nawp ziak in KSP hotute kiang in L.Phaijang ah ei chawn ding in ka hung kidawn a, ka kidawtna chu phal piak ka hia, tichun L.Phaijang a chun Mission teacher nasep tawh college kai kawp in TDC I year tiang 1990 June in ka hung zo ahi. Thagau lam ah Sadar bial sung leh social lam ah ka kihamatchak ma ma ziak in ka zilna lam tasam ding ahi phat in Pathian nasep ding tho tho chu ti'n Bible zil ding in ka kidawn a, ka insung miten chu ei phal bek puau a, pamai ei sa khawp mai uh ahi. KSP in ka kidawtna chu ei phal piak in Deputation in (teacher law kipuak in) 1990 June in B.Th Cheerapunji, Meghalaya in ka zil pan a, ka zaw zaw in 1993 in Probationary pastor ah siam ka ngal ahi. B.D zil ding in KSP kiang in ka kidawn kit a, deputation in 1994 June in Bishop's College, Calcutta ah B.D ka zil pan a, 1996 in ka hun zo a, 23rd February 1997 in Pastor piting ah Manipur Presbyterian Church Synod khawmpina ordained ka hi. Pastor ah kum 13

ka sep nung leh zi leh chate pitin nung in kochuam pawlpi ding khualna ziak in M.Th deputation zil ding in ka kidawn kit a, 2009-2011 sung M.Th (Missiology) Aizawl Theological College in ka zil hi. Theology zilna B.Th – M.Th hi second class (B) grade 60% in ka zo chiat ahi. Pathian zal in ka neulai a pat in lekha ka la he thei tho a, ha le ka hapan a, mumal tak ah class ka hung chawn to a pat ti chu class II vel a pat in class topper ka hung hi sek a, tuition fee free le ka la hi sek hi. Ahin la, matric vang third division in ka passed ahi. Zia ka genna ziak chu ka chanauten insung ah nang bep lekha simdawk kinei tin Govt. service bawl ding in ei la kineppiu a, Bible zil ding ah ka hung sak chun a kinepnau thawn in pamai ei sau a, ei phal lo pawl le um a hiu.

Thagau lam hinkhua leh Pathian nasepna:

L.Phaijang ah nu leh pate tawh kochuam ah ka hung um khawm ua pat mi la kitawm ngal, khanglai ding la um thei lo, kei chu regular tak ah kikhawm sek pen ka hia, Biakin kikhawp tak leh khuang khen in ka pang sek a, la chaang gen tawh ka kawp

sek hi. Biakin kikhawp sin leh ka kikhawm zing sek a, pel tak leh lekha phatak in ka sim sek a, ka kikhawp chun ka lekha simna a dal chuam pua, mi ka phaklo khawlaw diak puai. Sunday school phatak in ka kai a, Pathian ni lawi chin ding a um leh le, kikhawp sung chu ka chanauten ei sang ua, pel tak leh ka va thakhel kit ziang sek ahi. Chun insung in a naupang pen hileng le Pathian ni insung kikhawpna siam ka mawpuakna ahia, a siam pen in ka pang sek hi. Zia gual ah hinkhua ka hung mat to chu miten mak ei sau a, mite kihilna leh khawsung pachak ka law a, ka hinkhua kisiam to dan hi nu leh pa, taksa leh thagau ah ei puihuaitu ding leh lampi pha ei kawkmu ah ei hil ding nei lo maleng biakin leh khawtang hinkhua ah kihilnate chu zui to a, Pathian thu kigente chu phatak in ka ngaitha sek a, ziate chu a tak in ka zawm ngal ziang sek ahi. Ka hung tangval daw til leh ka pianthak til in Bible sim leh pauchapna ka ha bawl a, munthip lemchang ah leh dai pauchapna mun bik ka nei sek hi. Bible sim ka lung a lut a, ka dutui a, ka simte chun keima thagau

hinna ei chawm a, chun mak tak khat chu ka simte chu Pathian thagau hiatsak in a hilchetna le a hung kilang ngal sek a, ziate chu keima mimal thagau hinkhua ding in ka Bible zilnate sang in a kichian zawi. Tuhin Bible sim ka hung thabei ta, maleh tu tiang ah Pathian thu tamtak a bung a chang tawh ka tepte te hi zia lai ah ka Bible sim te leh Sunday school ah ka zilte a pat ahi. High school ka kai lai chun “Matric ka zaw tak leh missionary kuan ding ka hi” ti tupna ka la nei a, maleh Pathian kona leh lemguat hi ding ahia, matric ka exam masang in mission teacher ding in lak in ka hung um tai, Lalpa lopina chang ta hen.

Ka tanglak lai ah kipat in zia kum chun ka la kipe sia, zu leh sa, khamthei thil ka la bawl ah ti ding kum ka nei puai. Chun a him him in matric passed masang deu ah mission school teacher ding ah lak ka hi tak ziak in kipiak siatna ding hun ka nei lo ahi pen mai hi. Tichun kochuam leh social in ka lung lut ma ma a, zingkal tha ah mission teacher hina school kai in a, sun tak leh college ka kai sek a, insung haksat ziak in College gam pam

ah la kikai zo lo, kochuam leh khawtang ah kimatchakna ding a tam ma ma sek a, dawigual in college ka kai thei lo phat in kum 1990 in BA 1st year ka zaw in “Kihitileh phalo ding ahi, Pathian nasep nuam tho tho Bible kizil mai hen” ti’n thupukna nei in Bible ka hung zil ta ahi. Bible ka zillai ah ka lungthim ngaituana mittha (Vision) in Sadar District sung ah Pathian nasep ding dan a hung kilang sek a, a ziak chu zia lai chun Sadar gamthim, Pastor kua-ma chenden nuam lo na, a tam zaw’n Lamka lam a pat ei hun gal puak uh, siat leh phat ni’n le kochuamten haksa a kisa sek ma ma a, zia lai ah kochuam upate ka tilkhona chu “a la thuak ham ham phawt un, hung zo pai ding ka hi tai” ti in Bible chu thanuam tak in ka hun zil to a, maleh, ka vangsiatna leh lungngaina liantak chu kum 1996 ah B.D ka hung zil zaw in L.Phaijang Presbyterian kochuam a la um ta pua, local in a la kikhawm tau a, Pathian lemguat dan chu puak thiam haksaka sa, Presbyterian kochuam ah um chu Leilon leh Kharam Vai- phei bep a hung hi tai. Kei la KSP sponsored Bible zillai kihi ngal, I chenna khua kochuamte la Local

Church (independent) kochuam hi, Kum 1997 ah Pastor ordination ka lak chu khawte ei kipakpi ding ka nei pua, lung liangvai leh thawmhau a um khawp mai hi. Pastor ding ah ei la chawmtu pawlpi leh Pathian a ding ah la ka ginum a ngai ngal a, tichun haksa pum leh nuam lo tak chung in ordination zaw a pat in Sadar bial ah chun Pathian lalgam na chu huphul tak pum in ka hung sem pan a, L.Phaijang a chun le KSP kochuam hun chawmkhat phudaw kit ahi.

Sadar leh KSP ah:

Ka gen tak sa gual in pastor ah namdet ka hi a pat in Sadar bial ah kawin in ka um a, zia chu 1997-2004 sung ahi. Bang pen kibawl masa ding ahi diam ti ka ngaitua a, kochuam hi a pangai gual ah a chia to chun bangma khantona um lo ding ahi ti leh taksa leh thagau ah kochuam khantona ding in bang bawl ding ahi diam ti ka ngaitua a, zil-lai (ZLB) lam in le pan ka la, term khat president ka la hi. Tichun ka umna L. Phaichang kochuam local ah um ta chu KSP kochuam in ka puilut kit ahi. Sadar District panlakna zal leh Synod Evan. Lianzakap nasepna zal in Lei-

makhong ah kochuam phudaw ah hung hi. Zia zaw chun kum 2000 in Sadar District in Project bawl ah gam chawk ding kochuam phudaw ding ti committee ah ka puakdaw lai in kum upa lam ten a huphul ua, a vision phak puua a, maleh khangthak lam te support na zal in phasak a hung hi ta, tichun tu ah L. Champhai mun hi chawkdaw ahi. Ka neu lai in l nu leh pa masaten Sadar bial uh hi Kobru-Sub District, gamthim gam mawl a la ti sek ua, hi le ahi him a, Churachandpur mi a bial ah umden nuam kuama um lo ahi. A gam mi mawl leh khanto lo chun kochuam gam le nasatak in a khawi hi ti he zing pum in Project mun a chun School a hung kiphudaw ta, Khua leh kochuam le phudaw ahung hi ta, a khaw min ding in L. Champhai sak ahi. A kitup chu Leilon gam kum tam-tak kochuam thu ah kicham lo, kituaklo chu a hung kicham ding dawina zia ahi. Tichun kum 2001 in school chu hawn pat ahi tai. A school min ding in Presbyterian kochuam hotupa John Calvin min put sak in John Calvin Academy sak ahi. Chun a School motto ding in taksa leh thagau ah l gamthim salvakna hi ding dawin

na ziak in “Darkness to Light” Isai 9:2 a pat lakdaw ahi. Niamtak leh musit um tak ah kipan in gen-theina tamtak thuak in tuni din-mun hi a hung hi ta ahi.

KSP ah Kimatchakna:

Kum 2002 in KSP Executive Secretary ding in tel in ka hung um ta, Sadar bial ah na laklo tamtak nei maleng a lo thei lo ah nusia a hung ngai ta, zia kipat chun tuni tiang in Sadar bial ka tung kit ta pua, maban chu upate leh bialtute kithua in a hun semto zel uh ahi. Tuhin kum 20 a hung hi ta, chanchinpha vakvaipi in ka gam in malzin ka hung suak ta, Pathian nasepna chuam chuam in ka hung kimangcha to a, tuhin le na laklaw tampi nusia in PCI office ah KSP Office hi nusia kit ding ka hi ta, mihing lunggel a chun bang a tina dia aw ti le ka gel sek ahi. Maleh Pathian nasepna ahi ziak in a nawp leh suangchang le mang thei ahi. Mosi ‘ka’ ti gual ka tilona ding ah Pathian ei puina ahi dia aw ti le ka gel sek hi. Kei ka kipawimaw sak ma ma na chu Pathian in KSP a ding ah pawimaw ei salo ahi dia aw! Chun kei mabak tampi nei in kihe maleng khangthakte daltu ka hi kha dia aw! Kei kipawimaw sak

maleng mi a ding ah nawk sak khat to ka hi kha dia aw! ti te ka lunggel ngaituana tamtak a um hi.

Thukhakna:

A bang hileh PCI Office ah Administrative Secretary ka hi ding hi Pathian lemguat in gel hi tiu in, KSP khangthu a ding in le a masapen ahin, hung um kit kit ta lo mai thei a hin, Ebenezer Lalpan KSP hi zia tiang hi ei pui tung hi ti ah gel in kei mimal leh I KSP malam ding Lalpa khut in kikawl sak mai hi tiu. A tawpna ding in kei mimawl leh fello bawn Lalpan ei matchak thei ahi chun khangthak mi thiam tak tak te Pathian a ding ah I kipiak phawt uh ahi chun Lalpan thil lopitak semdawk ding in ei mangcha thei hi ti hemil puai tiu. Simtute zosia Lalpan malzawl ta hen. Amen.

--o0o--

THIANTHONA LEH THAGAU THU

 **Tongkholian**
Vaiphei Veng, Lamlongei,
Mantripukhri.

Thianthona leh thagau thu genthei ding ah Pa Pathian in ei umpi zing ziakin, Ama chung ah kipak thu ka gen masa ahi. Thiantho na hi Thuthung lui sungin 335 vei a kimu, Thuthung thak in 283 vei akimui. Ahileh thianthona ati hi banggual a um hi thiangtho ahi diam le.

1. Bible in tu kipat hin 18:9)

chingthei tak ah um in uain leh khamthei thilte him him ching lo ding leh athianglo him him la nek-lo ding ahi ti(Vaihawmte 13:4, Thiammpute Lekhabu 9:10-19, Isaiah 28:7, Rome 13:13, Ephesa 5:18)

Papi khat chu revival na ah pang ding in achia leh lampin ju dawn kham malam in Biak in a tunphat in thagau nasem te hawn inmai lam ah ahun nawdawk tau a, bang a gen tam iti leh pawsal leh humpin mual ah imu leh nek , Dam ah imu leh nedi pawm atina ahi. Zia pa gual achun ei hawn le iti nalai diam uh?

Chuleh la mit in apuksak chun kheldawk in la paimang ziang in, mit pani nei a gawt mun meidil ah la um sang in mit langkhat bei ah hinna lut chu a pha zawi(Matt

Zu kamkhat, talab muam khat, dumzial chang tawnkhat, kuva thaikhat in gawtmun meidil ei tut sang in paimang vek hitiu, hinna l lut thei na ding un. Mithiangtho a ding in bangkim a thiangtho ah himaleh mibuak te leh ginglote a ding in vang bangma athiang a um puai.(Tita 1:5)

Keima ka thiantho gual in nang-haw le la thiantho ding uh ahi.(1Peter 1:6) La phuak tun mithiangtho leh van kona chang te a din ati gual in Van kona chang te khamthei na sual in um puai tiu.

Suak leh Sal ah tang ihi laisia chu rapture nikhua leh chatuan council vaihawmna pang thei puai tiu. La kengtaw dap sut in la dinna mun kha mun thiangtho ahi ngala. (Nasepte 7:33, Isaiah 20:2,

Pawtdawna bu 3:5, Joshua 5:15)
Bang ziak ah Biakin a kengtaw l
kawi ngailo uh ahem? Biak insung
hi a thiangolo ahi diam?

Nikhat chu ka lawipa tawh me
hawl ah tang ah ka chiau leh
meiteite laibuk a um a, a ngakpa
kiang achun, kei uh le ka lut thei
diam uh ka ti leh lut thei in lau, la
keng taw la sut lo ua leh lutthei
puan lau ei tii.

Pathian ho lo ten bawn zia chu
a gen thei ua leh ei haw Pathian
hing ho ten Biakin mun thiango
ahi ti l hiat ua leh sut ah kawi chu
apha hilo ahem?

Thagau lam chawmcha genkit hitiu.

Nanghaw vang taksa um la hita
puau in thagau ah um la hi jawu
hi, zia ziak achun nangmau achun
Pathian thagau chu a cheng hi.
Kuanle Khrista thagau a neilo
chun amami ahipuai. (Rome 8:9)
Kuale mihing chapa gensia chu
ngaidam thei hintin, thagau thi-
angtho gensia chu ngaidam thei
hi puana (Matt 12:32)

l bible in Pathian mite ati hi
kuate ahi diam? Pathian thagau
changte leh a thiango zet te hi
atina ahi.

--o0o--

NUMEI HILEH PAWSAL HILEH ZI/PAWSAL NEI KHIAL HI THIL NAWP/BAI AHI PUI. -Zinei/pawsal nei hi la kisik kha em?

By: N. Lhungdim
Thangting House
Molnom West

Zinei/Pawsal nei kitihi bang dinga kinei hem? iti le

Khatna- BIOLOGICAL NEED- mi hiam hina a daw/pawimaw ziak
Anina- KIVAWPPI DING DAWI/PAWIMAW ZIAK chuleh

Athumna- adiak ah numeite ding a PROTECTION kiti chu midang apat a kihukdawkna tihi athu-pi pen ahi. Ka hinkhua a kamu khat chu 'Thi tiang a kivawppi ding telna hin mihiam ten lung-gel hapiak zo lou in, mi tam-tak hin zi anei un anei khial leh hinkhua tum kei a HAKSATNA, GENTHEINA ahi ti hi mi tam-tak in agel pha puau hi'. Ahileh Pawsal nei khial hi numei a dinga khawk zaw ahem? Ahilou leh Pawsal dinga khawkzaw ahem? Ka mu danin pawsal 100 lak a 80 tawbang hi azinei ah lungkim tawbang in am un, numei hi 100 lak a 60 tawbang hi lungkim zo lou in hinkhua amang un ka hiai. Hinkhua nuamlo sasa ah apawsal

umpi numei atamzaw hi cha leh nau aneziak a um mai mai taw-bang in ka mu ahi. Kichenna a lungkim tak a kicheng English a 'Happily Married' kiti hi athu ah akigen vangin kipak leh lungkim tak a zinei kiti hi mi atam bekset puai. Himaleh pawlam a mite et dinga chu kituak tak leh kilung-sia tak a drama thaw tawbang a umhi atam hi. Masang lai a Hindi film khat 'Mera Naam Joker' kiti Raj Kapoor in ala tho na a chun, ahinkhua a, anasep-asumlawna chu 'Mera Naam Joker' ahivan-gin atak taka chu ahinkhua chu nuam asa lo hial ahi. Zia ti gual ahin, nupan tamtak te hi nuamsa dan dan a hinkhua manga um hi atam mama ahi.

2005-2011 kikal a Molnom Christian Church a Chairman kahi lai in nute a dingin work-shop khat kasiam in workshop achu 'Kicheng thak kitding hita lechun la pawsal hi la tel kit na

diam?' tia dawtna kasiam leh mi phabep in 'tel kit ta puang ka, achim in kachim mawng mawng tai' tin ei dawnhu'u ahi. Zia guala chu zinei-pawsal nei ding phat leh hawitak ah kihettua ding, kinaw thethu a neilo ding, aphantna leh asiatna ti haw hawitak a kihetchian zaw phat leh kichen hi adjustment abailam ah, kihebeksetlo a kichengte hi mihiam pani khaw chuamchuam ahem, nu leh pa chuamchuam, background chuam chiat pani damsung a chengkhawm dinga ahung kithutuak uh chu a taktak ahung hi ding chu thil bailam ahi sek puai. Hinkhua a thil khaw pentak, mi tamtak hin ngaitua lo khatvei-nivei kimu ziak ahem a kidawi-kingai a kicheng hi ataktak ahiphat leh haksat, genthei kihawlina tawbang ahi sek ahi. 1975-1983 lai a ka service a Jorhat a posting ka hi lai in MZPT in article khat zik ding in eihung chial ua, kenle ka gel leh 'ZI/PAWSAL BANG TI TEL DING AHEM?' English a 'HOW TO CHOOSE LIFE PARTNER' kiti khat kala zik hi. Zia ka zik chu zi/pawsal tel ding hi-

- (i) Ahoi ziak, (ii) Aphant ziak,
(iii) Athiam ziak, (iv) Ahau ziak,

(v) Kochuam ah a kipiak ziak tite hi ahi, ti'n ka la zik a. La zi/pawsal ding chu achunga ki gen te laka khatchu hitei tei ding ahi. Achunga kigen 5 te neisuak kei umlo ding ahi. Zia guala chu priority chu la suk fel a lakthei leh neithei pen ding chu la ki telding angai hi. Pawsal hileh numei hileh amel le hoi, lekha le thiam, Pathian ah kimang mi, mi lungdia thei leh social a mipha a kihe kiti chu mikhat chung a um bekset lo ahi. Numei hileh pawsal hileh alim leh amel hoi te hi aphant vanga chu midang in ahun dawichat phat leh numei ding hileh pasal hileh azi/pawsal ventup chu ahak sek ahi. Khaw khat a chengkhawmte hi khawchuam a chengte sangin bang chan ahem khat in akihechian zaw'u a aphantna atam hi. Masang in kalawite khat kiangin, La khu'u a nungak hoi zia nu khule um a, Bang tia la kichenpi lo hem? Kati leh 'Zia nu khu amel ahoi vangin khawhelo ah kipuk sek(damlona khat) anei a, ziazia kachu kadonlo ahi. Ahinla zia ti gual natna neite haw hile avangphat ua leh aji/pawsal nei phat ua leh a khuti sek tapua'u ti ahikit hi.

Masang lai in ka In a

nasem chapang khat 'la zinu tawh la bang ti kimutua'u hem?' kati leh khatvei concert na mun ah ka kimu'u a, ka dawih ah ka kicheng pi ahi ti'n a gen hi. Kei geldan leh dawidan tak in numei leh pawsal kicheng ding hi atawmpen a tha 6 bek kihel a kichen ding, kihettuana dinga kihel ding angai hi. Ziahaw ziakachun ka tangval lai in nungak hi kamawk helhel pua, gualnop ah hel a kihin gal lo leh kichenpi tak tak dingin nungak ka la zawl kha puai. Aziak chu zi ding a nungak akihel phat leh thu tamtak um ahi. A family background bang ti gual ahem? Eima insung toh kituak ding mi ahi na'm? Nu-leh-pa, U-leh- Nau ten aphasana nau em? ti ngaitua detdet ding angai hi. A chutilo leh kichen phat leh l zi/pawsal a dinga le complication tamtak hung umdawkw thei ahi. Mikhat chungavang chu idawizosia kimlo ding ahi ti vang chu hetsa ahi. Himaleh, achungakagen 5 te lak ah a pawimaw pen a la gel khatbek chu aneitei ding angai hi.

Ka hinkhua a ka mu leh kahiat khat chu pawsal tamtak um maleh pawsal nei khial numei te hi a genthei pen ui. A pawsal

toh kikhen ding la cha le nau anei ziak in achate alungsiat a, kikhen ding chu a nuam kit pua, ahinla a hinkhua uh chu Gawtmun a um gual mi atam ui. Numei kimkhat hi a genthei nau hi anuteu ziak le atam hi. Nu khenkhat hile achate zinei/pawsal nei nadinga kiha kum takluat haw hi achaten nawpsakna in anei ngai sek puau. Ka ute khat in achapa tawh kingai nungak zosia chu aziak khat a um sak ah, ala haisak sek ah, a tawp in pau chuam leh ham chuam thaw khat tawh ahung kicheng tau a, 'La chate zi leh cha nei nadinga la ki ha kum taluai' kati leh 'l chate zi leh cha nei na a iki hakum lou leh midang cha zi nei na ding la hिलou' ti'n ei dawnhu ahi. Athu dan achu dik le le, ka ki hetpi nupi 4 leh 5 vel te hi achate zi leh cha nei na dinga akiha kum takluat ziak un, achate'n haksat-genthei a thwak law un ka mu'i. Nupi khat chu achanu mi gentheite chapa khat toh ahung ki lungsia tau a, ahileh 'Nang uh guala nicheng a nekkawm hawlte tawh kachanu kicheng thei puana' ti'n kiletsak takin ala pau a, ahinla chawmkhat zaw in ahung kikhen khawng tau a, zia zaw ah chun mihau-

sa chapa khat toh ahung kingai tau a, ahinla vangsiat umtak in mihaute chapa chu drug addict ala hita, chawmkhat zaw in AIDS hung vei in achanu le ahung thi zaw in, a pawsal chu le hiti mama chun ala mualliam kit ta ahi. Zia ki gen nu hile mi incheng thei leh mihaute le ahi diak lo ahi. A pawsal chun NGO officer ahi zia a chu kimawk letsak numei khat chu ahi. Kichenna ding ahin ahitheh leh family background kibang vang chu daw mi aum pen hi. Mihaute chaw kichenpi hile haksatna tamtak aum ahi. Zia guala chun mi gentheite chaw-chapa toh kichen le haksatna umlo diak lo ahi. Khawilam-khawilam hile haksatna hung umte chu kimaituapi a kithuakhawma do ding zaw ala hi. Aziak chu mi ahung kichen leh phung chuam hien lang hilele In leh Lo suang thei ding ahung hile haksat-genthe na zosia thawkhom ding ahung ngai ta ahi. Ka hinkhua a ka het khat numei Govt. service khat a um a, 'La pawsal in bang abawl em?' ka tileh 'ka pawsal in zu adon hi, adang bang abawl puai'. 'Zu achuti don leh thi pai ding ata chula' ka tileh... kithidaw leh ka ti ziang sek hi atia...

a thidaw ding chu la daw mi a? Ka tileh zia ti guala kei thalaw a kivak a zu don chu kadaw puai, atia. Zia ti gual case hi numei tamtak chungah atung hi ti ka hia ahi. Insung khantona ding leh machalna ding nasep thil bawl neilo ah azinu thalaw a kivak ah, asun-azan a zudon pawsal umlo diak lo ahi.

Pathian thu (Theology) ala sim numei khat le a theology simna a aloite khat toh a kicheng a, ahinla theology ala sim vanga alungsung a theology simte'n anei ding a kilawm- mi ngaidam hat ding, hinkhua a Pathian dawilam ah azi toh hinkhawm ding kiti thagau neilo mi ala hi. Meitei te'n "Lairik heiraga laisu khangdeba" atiu haw guala lekha thiamna lam a sangtak M.A leh Doctor Degree neileu le khawtang hinkhua a matric le pass lote lungput-lunggel nei bep atam hi. I chit-leh-thiamna degree inei teu chu I umchan I khanchan toh a kituak ding ahi. Mikhat chu M.A ahileh M.A te umchan guala um ding, M.A te thugen guala a gen ding, milak ah achut phat leh M.A te chut gual ah achut ding a ngai hi. University M.A Degree lanei a, matric pass lo te guala la

khawsak leh la M.A Degree chu la zawk leh mantheilo la sua suak ahi.

Zia haw zosia ziaka hin mi kimkhat zinei/pawsal nei thei ahivanga nei nuamlo loi aum a, ahinla bang ahem tia nei tei ding aguat leh numei te dingin kum 30 masanga pawsal nei apha'n, pawsal inle zi anei ding chun kum 40 masang a nei chu apha'i. Aziak chu ahung kichen zaw phat uh leh cha-leh-nau nei ding, zia achate'u chu chitna-thiamna ahung piak di'u, amau tegel chu la achate graduate masanga anasep nau le hung pension ta ding. Masang lai in Income Tax Dept. a zinei lou khat ala um a, tangval hinkhua chu nuam tak in amang a, ahinla chanu-chapa khat ahun nei in a service ahung pension ta, achanu chu ama ahung pension in class-7 bep ahinalai a abuai khawp mai ahi. Zinei/pawsal nei ding chu manei bekset vang apha'ua'n gei takluat ah nei chule buaina liantak tuak thei ahi kit hi. Kol numei tehi atangpi in apawsal a akiha ngak ua, ahinla ei thingtangmi te l hui leh chu pawsal a kiha ngak bekset puau in, ama changa apawsal umlo to bang a insung

pua a hing le aki tam hi.

Tuni a l gennawp uh chu numei leh pawsal kikal a kicheng/ nei khial hi numei te hi agenthei zaw'u a, a zia chu amau puakgik chu achate etkawl ding, a pawsal le etkawl ding, zia ban ah chun, adiak a ei thingtangmite lak a a pawsal insung mite le etkawl ding, puakgik liantak neite ahiu. Zia ti gual haw hi lungsiat khawtua ziaka kithuapi a kichai sak ziang ding ahilo zia kin, numei te hi a pawsal ding telna ahin extra care alak ding uh, a pawsal nei ding phat uh leh mi 2 mi 3 kianga adawt ua, lemsakpina adel ding uh daw i aum hi.

A tawpna pen in Zinei ding thu hi ka nei masang in serious tak in kagel ah nungak l ngaite kiang khat a kicheng hiti, tia chomkhat zaw leh kanu'n ei phal puai, kapa'n ei phal puai, tia kikhen ding tite chu mihiam hinkhua a zo gen kipatna ahi, ti'n la gel ah; ka in neipi hi toh kichen ding tia ka kinawptua zaw unle kum 2 val ka ki hel zaw un ka kicheng uh ahi.

“Ka zinei hi khatvei le ka kisik kha puai”.

FATHERS' DAY LEH CHILDREN'S DAY HUNG KIPAT DAN :

Pate ni : Pate ni hi kum zabi 20 na bul fil lam in US ah ahung kipan ta ahi. A masa pen in 19 June 1910 in Spokane, Washington ah YMCA hall ah Sonora Smart Dodd malat na in mat pat ala hi. Ama hin kum 1909 in nute ni kimat chungchang a la he kha, a pastor pau k kiang in Pate ni le mat ding in aphut hi. A kochuam ua hotute chun pate ni matna ding ngaidan anei chu pha a sak piu ah, Spokane ah a pianna khawpi leh a kiang kimvel a chun YMCA leh a kochuam ua hotute tawh kithua in pate ni hi official ah matna ding in nasa tak in campaign a bawl uh ahi. Tichun, pate ni matna masa pen chu a kochuam in June 19th , 1910 in a la mang pan tau ahi.

Pate ni hung phudawktu nu Sonora Smart Dodd (18th Feb. 1882 - 22nd March 1978) hi America Civil War lai ah sepai minthang William Jackson Smart chanu ahi. Dodd leh a naute paguk chu anu naunei na a thi nung in a pa Jackson Smart chun ama chang ah ahun etkawl piting uh ahi. Jackson Smart ziak ah pate ni hi hung kimang pan pen ahi.

Europe ah Catholic kochuam te chun 19th March (St. Joseph's Sunday) chu pate ni in a mang uh ahi. Zia chu Spain leh Portuguese te chun Latin America ah pawlut in tuni tiang in Europe ah gam tamtak in amang nalai ui. Himaleh America a chun 19th June ahiloleh June tha ah Pathianni thumveina chu amang uh ahi.

Chate ni :

Chate ni/naupangte ni hi khawvel pumpi mun chuamchuam in naupang te zana etsakna in naupangte ni hi ni chuam chuam in mat ahi. Rev. Dr. Charles Leonard, Chelsea ah Universalist Church of Redeemer ah Pastor pa malatna'n kum 1856 in chate ni hi june tha ah pathianni niveina mat ahung hi pan ahi. Zia ni chun Rev. Dr. Leonard chun naupangte chu kikhawpna bik neipi in naupangte chu Pathian khut in a kawlsak ahi. Zia ni chu Dr. Leonard chu "Rose Day" ti phuak in a lawm ah, a nung in "Flower Day" ti in san ahung hi tai. Zia nung kit a chun July tha ah Pathian ni niveina hi chate ni ah hiat ahung hi kit hi.

Kum 1950 apat in June 1, hi International Day of Protection of Children ti in khawvel mun chuam chuam in amang a hi. Chun November 20, hi 'Universal Children Day' ah mat ahi kit hi. Kum 2007 a pat in Illionois Governor pa chun naupangte ni hi June tha ah Pathian ni niveina mat ding in a puang ah, chun zia ni chu hiatpi ding in US President Barak Obama kiang inle dawtna a siam hi. Tuhin khawvel pumpi ah kochuam pawl chuam chuam tamtak ten June tha ah Pathian ni niveina hi 'CHATE NI' in a mang tau a hi.

India gam in naupang te ni hi 14th November in a kimang sek a, zia ni hi kawl pau in 'Bal Diwas' ti ahi. Zia ni hi India Independent hi nung ah Prime Minister masapen Pandit Jawaharlal Nehru pian ni a hi. Ama hin naupang te a lungsiat bek ziak in a pian ni hi naupangte ni ah kimang a hi.

*~Source : Hunbik Sermon panpitu by
Rev. S.T. Kaia Vaiphei*

--o0o--

MALAI KHRISTA GINTÎL LAI MITE DINMUN LEH, TULAI KHRISTIAN KUM 100 VAL ZUITATE DIN- MUN.

By:- Upa Th. Lalcha Vaiphei

Amasan Damna Aw suatute leh simtute josia hungkit pai ziang ta ding I Lalpau leh I hukdampau Jesu min in chibai.

Damna Aw April tha kisua kha ka la sim lai in thil tamtak ei geldaw sak in kahia, Ziate chu keima ngei in kamu leh kahiat, ka tawkhak leh kathem khakte chawmkim chan, kasim dawte tawsai sanin ka hun taklang ahi.

Masanglai Christian ka hilim lai in 1955 vel lai achun (L) Pastor Khaivung, leh hotu dangten athugen nau ah ka hiat zing te chu (a) Pathianni chan di dan (b) genthei leh puak gik puate dawn zangkhai ding dan pulpit chung ah a gen teu ka lungthim ah hung ki lang thak in ka hia. A ki bat lo dan chu, lei leh vangam gual in aki khia in ka mu ahi.

Zia hun lai ah chun Pathianni a hung tung ding tak leh Kiginni leh nu leh pa ten le Pathianni thiangtho tak ah matthei na ding in Medi bangkim hawltup san akawi ua Pathianni a chun kuaman huan ah anche cha le a hawl ngai puau hi. Zing an nek zaw leh biakin aki khawm ah. Sun leh Sunday School Pathian thuhing zilnan akimang ah nitak

leh kikhawpna a ki nei ah, sun hun awng kal ah, nupite ki hik et ah, hik hawl na sam tha ding le a phal puau ah, zia bak achun naupangte le thingchung kal lo ding thing dua natiang le lawthak lo ding, theiga nek ding natiang le lotha lo in kitup tak leh, Thiangtho tak in ala kimang sek ahi.

Tuhun khangthak Christian ten Pathianni I mat dan teu hi I et chun amin mai ah Pathian Ho leh bia akibang ziang ta I Christian hung hi nau h la kum 100 val lam hung ting ta, Pathianni mat na ding ah kiginlawk le um ta lo Kikhawp bang le a lo thei lo gual ah vei ham ham ah kikhawm kikhawp pel leh, nitak medi hawl pawl hik leh kha that i lo in gancha bang that pawl

chawlni ahi zia kin in nitak med-
ing miten dawinnau ti in gan that
ah sasel zuak pawl kiumta paisa
aki mu pol eh ti in l ngaitua chun
malai gingthak te tawh l ki khia
talua in l ngaitua dawk chang
uh um dingin ginchak aum hi.
Ahileh tuhun ah, Pastor leh evan-
gelist upate hin zia gual ah Chris-
tian Hinkhua mang ding ahin ei
ziltil uh ahi tadium tibang ngai-
tua kham in akilang ah, a lo leh
Khrista nung zui di dan hile Gov-
ernment in(Carfew) akawi ua a
tha kaw l gual ua ei uh khangthak
te ading ahin le thakawl na thu
eihil(ziltil) kha bang um ahi ta
diam ti thei phial ahung suak ta,
nungak tangval kaw i khat bang
kikhawp pel leh gari ate kitawl
in (park) ate chia ah, photo, lim
vaki la, nekthei nekhawm bang
ki um. l Pastor teu leh hotu teu
hin namen in l su mualpho puau ti
aki lang ah, amau haw a dingin
zachak um leh kisuan la na ding
mite hin l bawl piak uh ahi ti hi l
ngaitua thak ding un l daw i uh
ahi.

Mattai 22:39 Nangma la
ki hepi gual in lavengte hepi in
LAphuaktu chun Lungngaina l ki
kawp gik puak kidawn tua in zia
chu Lalpa dan zui na leh Thagau
mlazawl chan na hi a tia. Zia thu

ahin chawmcha l ho lim nuam
nalai uh ahi. Malai achun nun-
gak tangval lawm tang aki kuan
sek ah, Vai chia phat ah in lam
l hung phat leh lampi pam ah
nupi, upa ten, in thing aput zaw
lo ala kaw i, nupiten ala puak
bang teu bang aum khak leh hun
kipuak piak ah, in tun phat leh
ane i ki hawl ah kipe sek bak ah,
Changkhat nasem di nei lo te bu
chi thāk kikhêl di bang khawlai
ah aum leh akuan thei thei kuan
in Zingkal tha hi leh le ava kitu
chai piak sek tulai khangthak lai
ahin. Khawvel chankang zia kin
tadium bangpen zia kin ahidiam
alo leh l gen ma bang un tulai
Christian te lak hi l et chun Kuan
ei ziltil ahi ta diam l Pathianthu
bu kimu Samari gam ah khualz-
in pa gual in, mihatlo, puakgik
pua zo lo, l mu leh gamla deu
deu ah pel, khenkhat in paisa lei
piak leh keiman hipiak ka tibang
ki um l lal pau Jesun A gen gen-
thei khawtua ding leh hepina a
gen te hi l Pathian thu bu ahi aki
sumang ahitadium alo leh Pastor
leh hotute hin a gen khak lo uh l
bat sak ziang uhi, l ngai tua thak
kit dingun l daw i uh ahi pen mai
hi.

l Lalpau Jesun Peter ki-
ang ah a thu gen hi l ngaitua

thak kit ding un a dawî um hi Joh
21: 20-22 Peter chu avak ki hei
leh Jesu'n a hepi pa Johan amu
phat in Lalpa zia pa jhu bang
a ti diam , tin a dawng ah Jesun
ka hungkit tiang umding ti leng le
nang bang di la ti ahem ei zui in
ati kampau hi lopi ka sa ahi.

nau ahin mi dangte l et phat leh
l thilpha bawl ding te ki bawl ta
ngailo in A um sek ei ma leh Path-
ian kikal en in zui leu hin malzawl
na chu l chan ngei ding un l ki
nem uh ahi. Lal Pathian in hepina
naseppha te sem dawck chiat din-
gin ei malzawl ta hen. Amen

Ei un le Christa nun l zui

--o0o--

Dik la sa em?

By:- Rev. N. Dalla

1. A phatlona mi'n a melkhu khu ziangte hin, ki siamphat na châng a hethei puau ah, ki suasal ek ek ziangte haw hinle, thilpha a zui thei ngai diak puau.
2. Mi ama leh ama ki thununzo te khêl ah mihât ding a um puau a, ama leh ama nasan ki thunun zolo te khêl ah mi hâtmaw dingle kuama um kîtlo ahiu.
3. Mi nuainung te hi mi hâtlote ahi ziang puau ah, mi chung ah kilap sâng zosia hile mihât ahi him him lo uh ahi.
4. Lekha thiam zosia hi mipil ahi ziang puau a, mipilte chu lekha a thiam deu tei kît ua, pilna ding ah lekha simte sâng in, a lekha thiamna pilna ah mangcha theite chu mipil ahiu.
5. Sam ziktu chun "Thagum ah mi lâkpiak hi kimuanpi kin la, misuam hile kisanpi diak kin.." atia (Sam 62:10) tulai mi tamtak in thagum hât ah thil bawlthei chu kisuanpa in i ngai tau ahi.
6. Diktatlon a tawh thagum hât ah hung lawting te sâng in, diktatna leh thunuai gawlpa zia ah hung lawsam khate chun, lawtinna diktak a hung mu zawsek uh ahi.
7. Mipi a tamzawn bawl leule a phalo chu a pha diak pua, a bawl nuam kuama umlo leu le apha chu apha ahi zing ziang ahi.

8. Buaipilo ding khat hi i buaipei ahileh, buaipei ding khat hi ala ki buaipei khasek pua, buaina ding dawl ah i buailo ahileh, buailona ding khat ah ki buai nuam ahi.
9. Uicha leh mengcha vaithum akichu chu'u leh zawng achang hi, ti thusim gualin, tuchung election result i etleh mun khenkhat in a guitung ahi.
10. Gam leh nam puitu ding ah teldaw ah umte hi, a kineisak chuam bik i hung um zel ua leh vang, i gam i nam in ki dampi lo hial ding ahi.
11. Dawi in dawilo leu hinle sawlkar ngai ngai in ei pawkit ding ahita, tekse te'n "a salai i sawk lo leh aki hepui" atiu kha i tun phawt uh ngai didan ahi.
12. Thadou laphuaktu khat in "Ka lung heina ding uh ahi pou leh suh-gimna jong kasang ui Pakai" ala ti kha atak tak ah i tuak phawtlo leh khanglo theilo ding i tam ma ma'u ahi.
13. MLA hung kaidaw hi lawtinna ahi zinglai in, lawsapna huang sung ah valut patna le hung hithei ahi ziaikin, mipil leh mingawl hung ki hiat theina bul le hi ngal ahi.
14. Sum bep en ah mit hakte ding achun, MLA hi sum nak gual ah gelthei ahia, a hinla, gam sung siampha nuamte ding achun vang, mite mu'thei ah napha sep kipatna bul le hi ahi.
15. Noah suante khan Babel insang asau ah, khangto ah a kingai lai un, gamtin ah ahung ki thedal khawlaw ua, khat leh khat khat kiho theilona bul le ahung hita ahi.
16. I pu i pateu khan khantona ala hekha nai puau ah, a hinla, ala kiho thei ua, tulai chu khangto i ki sa ma ma tau ah, himaleh, i khantonau hi kiho theilona'n i mang gam tau ahi.

THAGAU THIANGTHO THILHITHEINA

Text: Nas. 2:1-4

~Pastor T.L.Mang Vaiphei

Thumasa:

Gingtute i vangphatnau chu Thagau thiangtho piak ah i um uhi ahi. La pianthak hun ah kipat khan Thagau thiangtho chenchilna (indwelling of the Holy spirit) chu la chang ngal ta ahi. Piangthak cha Thagau chenchilna changlo ti a um thei puai. Thuthunglui hun in a hi leh chu Thagau thiangtho in mite chenchil lo in thuamtu in a pang zaw ahi. Jawlnei te bang, a hiloleh Pathian in nasep bik nei ding ah a guat/ a sawl te THUAMTU in a la pang sek a, a umpi den lo ahi. Tu thuthung thak hun ahi chu gingu mimal tin te ei chenchil ta ahi.

I. THAGAU THIANGTHO CHU KUA A HEM?

Thagau Thiangtho chu Pathian ah mi pathum te lak ah khat ahia, Pathian bukim chu ahi. Ama chu bangkim hia, bangkim bawl thei leh muntin ah um ahi.

II. THAGAU THIANGTHO CHU BANGTIK HUN AH PIAK I HIU EM?

Thagau thiangtho hi Jesu van ah a kalto zaw ni 50 ni ah gingu mimal tin te chenchiltu ding ah piak in i um tau ahi. Zia Thagau thiangtho chu piangthak cha te hinna luatu, chechiltu chu ahi. Nang uhi Pathian Thagau thi-angtho chenna in la hiu ti helo la

hiu em? (I Kor.3:16).

III. THAGAU THIANGTHO TUNNA DING AH POIMAW TE:

Pentikos ni ah Thagau thiangtho tunna ding ah poimaw i Bible in ei hil chu -

1.Thumatna: Ngak un ti ahi. Jesu'n a nungzui te chu Jerusalem nusia lo ah Pathian thutiam Thagau Thiangtho chu ngak ding in a hil ahi (Nas.1:4).

2. Kinepna nei: Pauchap zing pum ah ngak ding ti ahi. Nungzui te leh numei khenkhat tawh Jesu nu Mari chu Jerusalem in dan chungnung ah chun phatchuamngai tak in a pauchap uh ahi (Nas.1:14).

3. Kithutuakna: Nungzui te

haw chu lungthim munkhat pu'n kithutuak tak in a um khawm uh ahi (Nas.2:1).

IV. THAGAU THIANGTHO HUNG TUN DAN (Nas.2:2,3)

Pentikos ni ah Thagau thiangtho tun dan chu zia gual hi ahi.

- 1. Thigua git hat tak tawbang:** Zia hi hinna leh thilhitheina etsakna ahi. Thagau thiangtho chu gingtute hinna leh thilhitheina petu ahi.
- 2. Lei (tongue) gual in:** Zia hin pauna leh thugenna a taklang ahi. Thagau thiangtho thilhitheina mang in i pau in thu i gen ding ahi.
- 3. Mei (fire) gual in:** Mei hin hithi-anthona leh etchianna a etsak ahi. Gingtute chu Thagau thiangtho sukthiantho ah um in etchian i hiu ahi.

V. THAGAU THIANGTHO TUNNA GA CHU (Nas.1:8)

Thagau thiangtho chu um-zia bei in a hung lo ahi. Thagau thiangtho chu gingtute

- 1. Thilhitheina i neina ding uh ahi:** Thagau thiangtho i chung ua a hungtun phat leh thilhitheina i nei sek uh ahi. Gingtute thilhitheina

chu Thagau thiangtho eima ah a tunna ah kinga ahi.

2. Hiatpitu hina ahi: Thagau thiangtho chenchilna chang ta chu mi piangthak te a hi. Piangthak ta te chu, muntin ah Khrista hepina chanchinpha hiltu leh hiatpitu hi ding ah mawpuakna nei te chu i hi tau.

3. Khrista chanchinpha puang ding ah ngansia ah um i hi tau: Gingtute chu Khawvel zosia chia ah nam tin, chi tin, pau tin te kiang ah chanchinpha gensawntu hi ding ah Lalpa'n ei guat te chu i hi tau ahi.

THAGAU LAM ZILLAI

Thagau thiangtho hi mawk chan thei ahi puai. Pathian thumatna, Pathian ah kinepna leh kithutuakna nei a poimaw hi. Tulai gingtute hi Pathian thumanglo, kihepituana leh lungthim munkhat pu theilo, himaleh, Thagau ah dim ah kikawi te i hiu. Pathian thu gual ah i hung hin phat leh ama Pathian ah kinepna i hun nei ua, zia kinepna mun khat neitute chu, Khista Jesu ah chun lungthim munkhat pu'n kal a suan khawm sek uh ahi.

Thutawpna:

Gingtute tuni hun ah nasep pha sem ding ah Thagau thiango chenchilna changtute i hinaw hemil lo in, i hinnaw ah cheng Thagau thiango daw lam hawl ah sempiting chiat ding in kisai tiu. Eimaw hinna chiat ki-enchian leu hin, Thagau thiango chenna tak ding in, nek leh dawn, sil leh chen umchan tawidan in i thiango zingnaw em? ti hi daw-

tna poimaw tak ahi. Nang ah Thagau thiango cheng ahi ti zing ngal a, dumkhu, khaini, shajan, kuva, talab leh hinna subuak thei nek leh dawn ne zing la hi chun, la hinna cheng Thagau thiango chu a hatlo ding mawng ahi. Thiango Pathian ahi ngal a. A dawigual ah hing ding in kisa thak hitiu.

--o0o--

Congratulatory Message

Dt. 17th May 2022(Tuesday) ni'n **Rev. D. Robert Thanga, M.Th.** in Rev. S.T. Kaia Vaiphei M.Th. apat in Executive Secretary KSP mawpuakna ala ta ahi.

"Pathian in a mawpuakna zo thei dingin malzawl ta hen".

*~Editorial Board
'DAMNA AW'*

KEILO PATHIAN DANG NEI KIU UN (Exodus 10)

By- K.L. Muana

Khrista thisan a mihiamte a tat zaw nung in mimal chiat hi Pathian chenna In ihi tau. Pathian chenna In a chun thil buak him him a um thei ta pua, mihiam zosia hi pathian chenna In mun thiangtho ama chenna In ihi tak ziak in, thil thianglo him him a um talo ding ah kineppi chu ihi tau.

Zia gual bawk a chun Lalpa maicham chu amitlo di ahi chuleh a mei chu a kuang ah a al zing di ahi. Maicham ah thiampu te'n kitatna leh kithawina a bawl ding uh leh lungthim thiangtho leh demna bei te'n kithawina a lan sek ui. Thiampu buak te chu maicham a chun athi mai sek un, mipite'n khau in a kai dawk sek uh ahi.

Zia a chung ah ki taklang gual in Jerusalem hi gingtute a ding ah mun thiang tho pen himaleh gitlona tin cheng, mun bawlaw leh kidak um pen ahung hitak ziak in Pathian lungnatna ahuai se ta, zawlneite mang in a soal uh sim ding in tamvei tak puan lawk in a um ah kuama'n a ngaisak puau, mei le kat a suk-mang thai ding in a um tau ahi. Tuni tiang inle mi thiangthote leh mi bawlsawmte khawpi ahi zing

ah, hun sin in buaina a pung hi.

Mihiamte hile Pathian chenna In hinna di'n ei ma leh thagau leh ginna'n l buai zing ui. Zia buaina luigal chu ikan theina ding in mimal ki sukthianlo chun zia tak Jerusalem mei le kat in hung ki hat tum ngai di ahi. Pathian in keima tilo chu Pathian ho kin ati ahiziak in khawvel thilte him him nusia ki hal thiang chiat hi tiu. Eima ma Pathian In tin gingtute leh temple chule kisu thiangtho in Vangam tep lawkna le hung hinf, khawvel chamna leh zalenna um tan tin chuleh chamna, muan-na leh Pathian thu he nailo te le Lalpa kiang ah ki pui lut di ahi. Zia phet chuleh Lalpa chuatuan lemguat lawkna chu lunggual tak ah a min chu chawihawi tai tiu in, lim tak leh kinem tak in Lalpa ni ngak tai tiu.

Presbytery sung thu chuam chuam – May 2022

1. PMS Tispari ah School naupang ginchak khel ah a hung tam thut ziak in, teacher khat lak belap hileh ti ah School lam dawtna chu M & E. Committee in ngaitua in a dawtnau chu phal piak ahin, Mr. Janggalal @ Zabeth s/o, Upa Seinek Leilon chu lak ahin, Joining report a hun pe ta, 2nd May 2022 a pat in a sem pan ngal tai.
2. PMS Tispari school naupang ginchak khel ah a hung tam thut ziak in a school building in a dawl lo ziak in M & E. Committee thupukna dungzui in extension bawl piak ding ah a hun dawtnau chu school building lui lam verandah keklet ahi. Kum bul lam a khan le building lui leh thak kisuktuana verandah chu a la ki keklian (extended) ta ahi.
3. R & D Committee phasakna dungzui in damlo khenkhat a la kivetha, ziate chu: i) Upa Pautinlal Kharam Vaiphei ii) Nu Boboi Vaiphei w/o, Mr. Jamlalsam Computer Operator, KSP Office, Tangmual leh iii) Mr. Thangmuanlian s/o, T. Upa Henkhomang of Saipum ahi.
4. Cachar Mission Field ah Good Friday sung khan Gospel campaign bawl a hin, lawk tak ah hun mat ahi. Evan. Jangkholam le Cachar Mission Field lawtinna ding in theitawp sua in a pang zing a, a ansepna lawtin theina ding in pauchapna delzui zing hi tiu.
5. Date 8th May 2022 ni khan Sekmai Mission Field ah Rev. S.T. Kaia Vaiphei, Field Secretary in Baptisma mi 10 val a chan sak hi.
6. Date 10th May 2022 (Tuesday) ni khan Nepal Kathmandu ah Mission Field hawna ding in M & E, Committee member te, Pastorte leh Evan. Suman Thapa leh Mr. Prem Moktan Kathmandu ah “Obedience Church” representative ten mission nasep khawmna ding in MOU (Partnership) suai kaina a nei tau. November 2022 a pat in KSP in le Nepal Kathmandu ah Mission Field kinei pan ding ahi tai.
7. Khuga Sadar Presbytery thupukna leh guanggalna dungzui in Date 17th May 2022, ni khan KSP Office ah Executive Secretary mawpuakna chu Rev. S.T.Kaia Vaiphei in Rev. D. Robert Thanga khut in a lan tai.
8. Rev. S.T. Kaia Vaiphei chu Date 30th May 2022 (Monday) ni khan

- Shillong ah Presbyterian Church of India Office ah Administrative Secretary hi ding in Churachandpur nusia in a insung mite tawh a kipan dawh tau.
9. Date 4th May 2022 ni khan KSP Half- Yearly Audit fel tak in zaw ahi ta, auditor te chu : i) E. Upa Khamthianlun, L. Champhai, ii) T. Upa K. Paul, Kangvai leh iii) T. Upa Haulallawm, S. Kawtlian a hiu.
 10. Date 6th – 8th, May 2022 sung in Tispari Mission Field ah Gospel campaign bawl ahin, speaker in Pastor John Sharma leh Pastor Charamani Sharma gawi ahin, lawk tak ah hun mat zaw ahi. Zia gospel campaign hi KSP hotuten le a va uap uh ahi.
 11. PMS Tispari ah Caretaker ah sem Mrs. Maya Kelki of Tispari chenna In huipi'n Dt. 4th May 2022 ni'n a la mut siat ziak in Sadar District (KSP) leh Sadar District PWF ten a ni mama in vena a va nei ua, kithuapina/panpina a va piau a, kipak um hi. Chuleh Dt. 06th May 2022 ni'n KSP hotuten R&D min in vena nei in, panpina a va piau ahi.
 12. Presbyterian Church of India, The 44th Biennial General Conference Umroi Biakin(Ri-bhoi Synod, Meghalaya) ah date 28th April – 1st May 2022 sung ah kimatna hun ah ei Presbytery apat chiate/ava pangte: i) Rev. S.T.Kaia Vaiphei, ii) Rev. Thanglianmang, ii) Rev. Siam Phaltual iii) Rev. Lienthienmang, iv) Rev. Seilunlal, vi) Pro. Pastor Khaiminlun, vii) Upa S.T.Siam, viii) Upa LL Mang, ix) Upa D. Mina x) Upa Kailianlal te a va pang thei un, chuleh Administrative Secretary, 2022-2025 sung a dingin Rev. S.T. Kaia Vaiphei, Khuga Sadar Presbytery Manipur Synod tel a hi.
 13. Standing Committee phasakna dungzui in Kochuam Upate leh Tual Upate Seminar Date 8th April 2022 nin HQ Church, Tuibuang KSP ah nei ahin mi 100 vel chiakhawm ahi. Resource person in Rev. Dr. Hangpi Manlun, Executive Secretary ZPCS leh Rev. K. Muana, Field Secretary TP. mat ahi.
 14. Manipur Presbyterian Youth Fellowship(MPYF) in CKKP(KSP) visit Nghathal P.C(KSP) ah Dt. 24/5/2022 nitak in a nei ui. MPYF nuai ah KTP(TP), EMPYF leh CKKP apat in member tamtak chiakhawm in kikhawpna hun mat ahi.

'DAMNA AW' PHUNGVUKTUTE :

PATRON MEMBERS :

- | | |
|-----------------------|-------------------------------|
| 1. Pu P. Vaiphei IAS, | Imphal |
| 2. Upa Henthianthang, | S.Kotlian |
| 3. T.Upa Haulallawm | S.Kotlian |
| 4. Upa Thienkhomang | S. Kotlian |
| 5. Upa Laltinkhup, | HQ. Church, Tuibuang |
| 6. Pi Manliankim, | HQ. Church, Tuibuang |
| 7. Upa D. Mina, | Lingsiphai |
| 8. T.Upa Ph. Gena, | Lingsiphai |
| 9. Pu. Khamlal | Saipum |
| 10. Pu Khamliankap | Saipum |
| 11. Pu. Tinlunlal | Saipum |
| 12, Pu. S.Kapbawi | New Delhi |
| 13. Upa Genhau | Central Church, Compound veng |
| 14. Pu. Khailianbawi | Central Church, Compound veng |
| 15. Pi Kimtawi | Kohima |
| 16. Tv. Daniel | Tangmual |

MEMORIAL GIFT :

- | | |
|--------------------------------|--|
| 1. Pi Deem Melody, | Central Church, (Rengkai)
<i>[In loving memory of (L) Upa Lamthianlal]</i> |
| 2. Pi Rebekah | Kangvai
<i>[In loving memory of (L) Pastor Khaivung]</i> |
| 3. Upa Liansawmthang | Lingsiphai
<i>[In loving memory of (L) Pu. Henzagen]</i> |
| 4. Pi. Nem Grace Boisi Capvung | Delhi
<i>[In loving memory of (L) Pi Vanlalchhuangi]</i> |

SUPPORTING MEMBERS :

- | | |
|---------------------------|-----------------|
| 1. Upa Khomlunlal | S.Kotlian, |
| 2. Pu. S.Thangminlian | Lingsiphai, |
| 3. Pu Lelboi, | Lingsiphai |
| 4. T.Upa Lalneilian | Central Church, |
| 5. Pu EL Soson | Central Church |
| 6. T.Upa Genminthang, | Central Church, |
| 7. Pi. Kimneihawi | Saipum |
| 8. T.Upa J. Mark | Saipum |
| 9. Pu Genthiankap, | Nghathal |
| 10. Pu Lianzakhup | Nghathal. |
| 11. Pu Lemthang | L. Mission Veng |
| 12. Rev. S.T.Kaia Vaiphei | Nghathal |
| 13. Nk. Dimkhoniang | Zikpi Tampak |

ENCOURAGING MEMBERS :

- | | |
|-------------------|-----------------|
| 1. Pu K. Minlian | Tangmual, |
| 2. Upa Ph. Kamlam | L. Champhai, |
| 3. Upa S.T.Siam, | L. Mission Veng |
| 4. Pi Chhungi | Hq. Tuibuang |
| 5. Pu S. Paumuan | Saipum |

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

(i). Patron member- Kum 3 (three) a ding in. ₹. 3,000/-

(ii). Memorial Gift- Kum 2(two) a ding in. ₹. 2,500/-

(iii). Supporting member- Kum2(two) a ding in ₹. 2,000/-

(iv). Encourager- Kum 1(one) a ding in. ₹. 1,000/-

Chun, sum thawt nuamte a ding in:

A/C name: Khuga Sadar Presbytery(MPCS)

A/C nos: 32483318505

Branch code: 6182, CCpur

CIF nos: 86412486695

IFSC nos: SBINOOO6182.

--o0o--